

**Təntən sagı tə,
Piyerə
nə púpúní
Piyerə təntən sagı tə yuu wa
sugv**

Lìu tə, v nə púpúní sagı kv tə
Sagı kv tə yı *tuntunu Piyerə nə púpúní kv.

Lìa tə nə, v nə púpúní
Piyerə púpúní v sagı tə v pa *Kərisə lìa tə nə,
ba nə wulə luv tə mama wa. Silasə də san wá
kv púpúnú wa.

Sagı tə wa sugv
Nəjə kv tə yırı, v nə púpúní ba nə: *Kərisə
lìa tə wulə càn wa, ba nə ken ba waa Zwezi nə
tə yırı. Ba vànà wulə tə gwàrì.

Piyerə púpúní ba nə, sə v ma dən ba jìàn ba
nə ken ba waa Zwezi nə tə yırı, də yala tə yırı,
ba nə jə də wá. U swìn ba con, sə ba twá Yu
cwəjə tə nə zəni, də pùé nədv.

Təntən jònà bwáí

¹ À mù Piyerə yı Zwezi-*Kərisə *tuntunu. À mù
nə púpúní sagı kv tə, à pın á mù lìa tə nə, Yu nə
kúrí. Á dəri á zv Pon, də Galasi, də Kapadəsə,
də Azi, də Bitini nagwanεε tə wa. Á jigə vərə tə
bwálá təntə wa. ² Á yı nə nyına Yu nə kúrí aba,
v tún vàn nə, kv nə ba yigə, ndə v nə tanı kv, sə

ku ya nɛtv. Á twá v *Siŋu tɛ nɛ, v pa á jì v lià, á yá á tiàn míámíán Yɪ jìàn wa, sɛ á sɛɛ Zwezi-
*Kərisə nii. Yá Zwezi-Kərisə jana tɛ dàń wá sɪn á cuna tɛ, tɛ li. Yɪ nɛ wá fwa pubwanv á yɪra, v ga pa aba v bɪcan sié, tɛ nɛ súrí wuuu.

*Yɪ pɪn nɛba Yɪ, ku nɛ ba zwèe v con
(Efɛzə tiàn 2.4-8; Romə tiàn 8.17-18; 16.25-26;
2 Korəntə tiàn 4.17-18)*

³ Nɛ bwɪa Yɪ nɛ. U yɪ nɛ *Yuu-Tiu Zwezi-
*Kərisə nyɪna. U mù nɛ pìí v bwɪn Zwezi-Kərisə v li tɪan wa. Yá v dɛri nɛ yinɛgə zɛnzɛn. Ku pɪn v twá ku bwɪun tɛ nɛ, v pa nɛba mu nɛdɛn dɛ yala, máŋá mama wuuu. ⁴ Ku mù nɛ pɪn, nɛ yèé dɛ, Yɪ tanɪ twɛrɛ v tún nɛ nɛ, Yɪ *sàń nɛ. Wiən tɛntɛ wàri tɛ cùgà. Durɛn wàri tɛ tɛ zwɪ, tɛ zɛni ga wàri tɛ zwèe. ⁵ Nɛ mù keni nɛ waa Zwezi nɛ wuuu. Yɪ wá twá ku nɛ, v cì nɛ nɛ, dɛ v diàn tɛ. U wá jon nɛba v kɛ mu wa, ku nɛ ba zwèe v con. U wá bɪri nɛba mu tɛntɛ, lɛv zanv máŋá wa.

⁶ Ku mù nɛ pɪn, yìèn yiri mama nɛ swɛ tɛ mɛ, sɛ tɛ wɔwɔlɛ aba, máŋá mancɪn ku tɛ wa, á mɛ, sɛ á tɛ ya pupwɛn nɛfarv wa á jwɛ. ⁷ Yìèn tɛntɛ wɔwɔlɛ aba, sɛ ba ma lwarɪ dɛ, á nɛ keni á waa Zwezi nɛ wuuu, cígá cígá. Nɛ wàá síán nɛ tì nɛ ma maŋa ku. Síán yɪ won tɛ, ba yàá kɛ mɛn wa, sɛ ba ma na dɛ, tɛ nɛ zìɛn. Yá tɛ ga yɪ won, tɛ nɛ wá cùgù tɛ jén dɪn don nɛ. Mɛ ku yɪ nɛtv dɛ á dɛ nɛ keni á waa Zwezi nɛ wuuu. Ku jə funɛ ku doni síán. Á nɛ zɪɪ diàn ku yoo tɛ wa, ku mù nɛ wá pa, Yɪ bu á nɛ, v ga pa aba dun, v ga zìlí aba máŋá tɛ, Zwezi-Kərisə nɛ wá pìí v bà, v

biri v tìàn, v nan á yíá yuu. ⁸ Á wà Zwezi ni, yá á ga swə wá. Á ba wá na síún nè, yá á tə kəni á waa v nè wuuu. Kù mù nè pɪn, á sú də pupwən nəfarv. Kù pupwən təntə dwə kù tə, liù nè wáá v swìn də v nii. ⁹ Á keni á waa Zwezi nè wuuu. Kù ɲwírán nè yɪ, Yɪ nè jon aba, v kə mi tə wa, kù nè ba zwèe v con.

¹⁰ Máná don wa, Yɪ nii *sùsùnà ken diàn, sə ba lwarɪ kù tə nè yɪ, Yɪ jon ba v kə mi wa, kù nè ba zwèe v con. Ba dí yáá ba swìn Yɪ pubwanv tə yoo, v nè tanɪ, sə v fwa á yɪra. ¹¹ Yɪ-*Siɲu tə yà wulə də ba. Yá kù mù nè swìn tə yìèn tə ba con. Ba yà ken cígá, sə ba lwarɪ máná tə də won tə nè, Kərisə càn tə də v dun, tə nè wá twá, tə ma bà. ¹² Yɪ-Siɲu tə gwin tə yìèn təntə dèñ, kù biri ba. Yá tə yìèn təntə yà tà ba mù nè wá na tə ba yíá wa. Yá kù lwan, kù yɪ á mù yɪrɪ. Síún nè, lià tə, ba nè swìn sɔywánú tə, dàñ swìn tə yìèn təntə, ba biri aba. Ba swìn tə də Yɪ-Siɲu tə, v nè tun tə, diàn. Yá Yɪ *malike tə tətə yà sóní, sə tə də yəni tə yìèn təntə.

Yìèn tə Kərisə liù nè mɛ, sə v fwa

(1 Tesalonikə tiàn 5.8-9; Efɛzə tiàn 5.1; 1 Korəntə tiàn 6.20; Titə 2.11-14)

¹³ Kù nətɔ tə yɪrɪ, á kənə á pubɔɲa bwálí nədɔ, sə á va yáá. Á pɪan á ya lià tə, á nè yèé yoo dèñ. Á kənə á yala mama, Yɪ pubwanv tə nè. Máná tə, Zwezi-*Kərisə nè wá pìí v bà, v biri v tìàn á yíá yuu, v wá fwa v pubwanv təntə á yɪra. ¹⁴ Máná don yɪn lá, á yà yèrɪ Zwezi-Kərisə, á ga twá á pùé yokokwɪnan fɪra nè. Á kùò dàn ká pìí

á twá tø nø. Síún nø, á dàń yana ndø bisíná nø, ba nø sèe nii. ¹⁵ Yıı dàń kúrí aba, v ga yıı bıcapon tíú. Á dø mε, sø á jı bıcapon tıán, ndø Yıı nø, á tötünan mama wa. ¹⁶ Kú púpúnı Yıı sagı tø wa, kú wó: «Á yana là tø, á nø yıı bıcapon tıán, ndø à mù Yıı nø ya bıcapon tíú».

¹⁷ Á yıjıı wa, á yàá boņø Yıı á nyına. U mù nø yıı liù tø, v nø ba liù kúrí, v ma bürı kú tíú bürà, kú tø yıı, v nø fwa. Máná tø wa, á nø wulø tia yuu wa, á dàń mε, sø á zılı wá zenzøn. ¹⁸ Kú yıı cígá, á tün tötünkükwınan tø, á nyına-ba nø ma kwè aba. Tø yìèn tøntø yà ba døn jø. Á yèé, Yıı ηwín ηwírán nøfarv, v ma yè aba v jon, tø yìèn tøntø yıı. Kú tø, v nø ηwín, kú tà ndø sèbiu nø, kú nø wàá kú cùgà. Kú tø, v nø ηwín, yıı kú cıı. ¹⁹ U pın Zwezi-Kørisø yıı ndø *pabiø nø, ba nø gva, ba ma fwa *jonı. Cuna yà tèlé v yuu wa, v ga ba durøn jø. Yá kú yıı Zwezi-Kørisø jana tø, tø nø jø funø zenzøn, Yıı ma yè aba v jon. ²⁰ Yıı yà dí yáá v kúrí Zwezi-Kørisø, v tün kú yıı, dø luv tø wà fwa. Kú kwa nø, v bıı wá aba luv zanı máná tø nø, á mù zøni yıı. ²¹ Kú twá Zwezi-Kørisø nø, á ma kø á waa Yıı nø. Yıı pıı v bwin wá v lı tıan wa, v ga pa wá dun. Kú mù yıı, á keni á waa v nø wuuu, á ga jø yala dø wá.

²² Á sèe á twá Yıı svgv tø nii nø, kú nø yıı cígá. Kú pın á bıcanı yıı nøpon á ga swø là tø, ba nø yıı Kørisø là tø, dø cígá cígá sonu. Á dàń swın á con, sø á sónı duøn zenzøn máná mama dø bıcan nøpon. ²³ Á yèé dø, Yıı twá v svgv tø nø,

υ ma pa aba mu nədun. Ku sugu tə wulə wuuu, ku ba zwèe mama. Ku wà twá də ləzwənə tə, υ nə wàá υ ti, υ ma pa aba mu təntə. ²⁴ Ku púpúní Yü sagi tə wa, ku wú:

«Ləzoni tə mama yi ndə gau nə, ba dun də me yi ndə wopunə nə. Gau yàá ku, ku punə tə ga twi tia. ²⁵ Yá *Yuu-Tiu sugu tə mù dān wulə wuuu, ku ba zwèe».

Ku mù sugu təntə nə yi Yü sbywánú tə, ba nə swìn ba biri aba.

2

¹ Ku mù yiri, á lia á tìàn wulənu, də gıgıra yiri mama wa. Á dānà ká ya níé bələ tìàn. Á dānà ká zıga là duən nə, ku tìàn wiən yiri. Á dānà ká swìn yolwan á pa là nə. ² Á yana ndə bisìní nə, ba nə luri síún, ba ga pìà yılı mánjá mama. Á mù yılı nə yi Yü sugu tə. Ku yi yılı tə, won nə wà ku waa gúlí. Ku mù nə wá pa á boru, ku ga wá pa Yü jon aba, á cuna tə wa. ³ Á cígá ni də, *Yuu-Tiu ywán zəni, ndə ku nə swìn nətu, Yü sagi tə wa.

*Zwezi yi ndə diè nigwancıun wárí nə
(Efszə tìàn 2.20-22; Tıtvonan 4.11-12; Matıə 21.42-44; Romə tìàn 9.24-26)*

⁴ Á dān fārá á yí *Yuu-Tiu yıra. U yi liù tə, υ pın mu. U yi ndə kapan wárí nə. Ləzoni vıga wá ba dıgu, ndə wotutu nə. Yá Yü kúrí wá υ tún, υ ga jə funə zənzən, υ mù Yü yáá con. ⁵ Á də yana ndə kapana tə nə, tə nə nəñə, sə Yü tì aba, υ ma lwà diè, υ pa υ *Sıju tə nə. Ku twá də

Zwezi-*Kərisə, á dàń wá ya ɔ̀ mù cɪcɪ *jonwana ku diè tə wa, sə á twá Yɪ-Sɪŋu tə á tɔn á pa Yɪ nə, ndə *jonɪ nə á pɪn wá. Yá ku nətu tə poli Yɪ pùé. ⁶ Ku púpúní Yɪ sagɪ tə wa, ku wú:

«Á nəŋə, à tún kapan tɪv tə wa, ba nə boŋə <Siyon* >, sə à lwà à diè ku yuu wa. Ku yɪ diè tə nigwancɪn wárí. Á kúrí ku, ku ga jə funə zənzən à yáá con. Yá liù tə, ɔ̀ nə ken ɔ̀ waa ku kapan təntə nə, ɔ̀ bá dé cavira mama».

⁷ Á mù lià tə, á nə ken á waa ku nə, ku yɪ won tə, ku nə pɪn á jə dun zənzən. Yá ku tà nətu lià tə con, ba nə wà ba waa ken ku nə. Ku púpúní Yɪ sagɪ tə wa, ku wú:

«Ku mù kapan təntə, dəlwərə́ tə nə vɪga ba dɔgv vàn nə, ku mù nə pií ku jì diè tə nigwancɪn wárí, ku yoo nə cà. Ku jigə kapan, lià mà ba nəe ku nə, ba twɪ».

Ku kúv púpúní Yɪ sagɪ tə wa, ku wú:

«Ku mù kapan təntə pɪn, lià dɔga cwəŋə ba jén».

⁸ Ku yɪ ba nə wà Yɪ sugɔ̀ tə nii sèe yɪrɪ. Yɪ nə ken, sə ku ya nətu ba yɪra.

⁹ Yá á mù dàń yɪ dwíí tə, Yɪ nə kúrí. Á yɪ *jonwana púlí tə, á nə tɔŋa á pɪn ɔ̀ mù piú tə nə. Á dwíí tə ya Yɪ cɪcɪ nə tɪ. Á yɪ Yɪ tətə púlí ɔ̀ nə tún. ɔ̀ kúrí aba, sə á swɪn yìèn nəfaran tə, ɔ̀ nə fwa, á bɪrɪ lià nə. ɔ̀ yɪ liù tə, ɔ̀ kúrí aba, ɔ̀ lɪ yikunu wa, ɔ̀ kə ɔ̀ poni nəfarɔ̀ tə wa. ¹⁰ Dí yáá nə, á yà tà Yɪ púlí, ɔ̀ nə tún. Yá síún nə, á dàń yɪ Yɪ nə tɪ. Dí yáá nə, Yɪ yà wà á yinəgə

* **2:6** 2.6 Siyon yɪ paan tə, *Zwerizalemə nə lwè ku yuu wa, yɪrɪ nədwan.

zənzən dəri. Yá síún nə, Yıu dǎn dəri á yinəgə zənzən.

*Kərisə là nə mə, sə ba ya nətv
(Romə tìán 13.1-8)*

¹¹ Á nubisoni-ba, á lie á tìán də, á yı vərə tia yuu wa. Yá á ga yı là tə, á nə ɛ. Kú mù tə yıri, à dǎn kwè aba, sə á lı á tìán yìèn tə wa, tə nə yı ləzwənə pùé yokukwınan fıra. Tə yìèn təntə yáá kəni diàn, sə tə cùgù aba. ¹² Á pıan á tütüne mama ya zəni, là tə nə tà Kərisə là yáá con. Á nə jə á tìán zəni, ba nə swə ba swın də á fwa lwanı, ba wá na á tütünzəŋə tə, á nə tıŋa. Yá ba dǎn wá bu Yıu nə, dıın tə nə, v nə wá bà.

¹³ Á tàà *Yuu-Tiu yıri, á sèe là tə mama nii, ləzoni nə lı ba tún, sə ba ya á yun tìán. Á siá pıú tə nii, v nə jèé á luv nii pèegá tə mə yuu wa. ¹⁴ Á siá yáá tìán tə nii, pıú nəfarv tə nə lı v tún. U yı v tún ba, sə ba kə là tə, ba nə fwa kú tə nə lwara, càn wa. Yá ba ga bu là tə nə, ba nə fwa kú tə nə ziən. ¹⁵ Yıu fıra tə yı, sə á fwa kú tə nə ziən, sə ləyərən tə, də là tə, ba nə ba yənu jə, ba ga cəgə aba, pú ba níé. ¹⁶ Á yana là tə, á nə tı á tìán, Yá á dǎnà ká tàà á nə tı á tìán tə yıri, á fwa lwanı liù yıra. Á dǎn mə, sə á ya ndə nətv Yıu tütùnà nə mə, sə ba ya. ¹⁷ Á pıan dun liù mama nə. Á şwéné á duən Kərisə là tə. Á zilé Yıu zənzən. Á pıan dun pıú tə nə.

*Á díé càn ndə Kərisə nə
(Efəzə tìán 6.5-8; Titə 2.9-10; 1 Piyerə 3.14-18)*

18 Ywəŋə-ba, á sià lià tə nii, ba nə yè aba. Á zilé ba zənzən. Á dənà ká fwa ku, ba tə cɪcɪ yɪra, ba nə jə aba də bɪcabwanv. Á fwa ku ba tə də yɪra, ba yoo nə dà. 19 Liù wàá càn v dé, v nə zilí Yɪ yɪrɪ, v ga wà won fwa, ku nə ba ziən. Ku tíú nə sɛe, v dé tə càn tə, ku yɪ Yɪ pubwanv. 20 Ba nə firɪ aba á yolwana yɪrɪ, á nə fwa, ku ba dun jə ku pa aba. Yá ku dən nə yɪ zəni nə, á fwa, ba ga kə càn á nə, yá á píní á dé tə, ku yɪ Yɪ pubwanv. 21 Zwezi-*Kərisə tətə nə dí càn, v pa aba. U fwa ku nyɪnyɪga, v bɪrɪ aba, sə á ma wàní á fwa, ndə v nə. Yɪ kúrí aba, sə á dé càn nətɔ. 22 U yɪ liù tə, v nə wà cuna fwa. U ga yɪ liù tə, kunkun nə wà v nii wa nan. 23 Ba nə twɪn wá, v wà ba twɪn, v ma ŋwín. Ba ken wá càn wa, v wà ba nii nə ba. U tì v tiàn, v kə Yɪ jìàn wa. Yá Yɪ nə b̀̀r̀r̀ b̀̀r̀r̀, ku nə yɪ cígá. 24 Zwezi-Kərisə tətə nə zɪn nə cuna tə v yuu wa, v ja tɪ dagarv tə yuu wa. U fwa ku, sə nə ya lià tə, nə nə lɪ nə tiàn cuna wa. U fwa ku, sə nə ya mɪ wa, nə ga fwa yìèn tə, tə nə yɪ cígá. Ku twá v nɔran tə nə, á nɔran tə ma zwèe. 25 Cígá, á yà yɪ ndə pee nə, tə ywanɔ. Yá síún nə, á píí á bà á twá liù tə nə, v nə cì á nə, v ga ywàŋá á yuu.

3

Kan də v barɪ nə mɛ, sə ba ya nətɔ duən nə (Kolosə tiàn 3.18-19; 1 Timote 2.9-15; Efɛzə tiàn 5.22-23)

¹ Síún nə, á m̀̀d̀ kana-ba də con, á liù mama mɛ, sə v sɛe v barɪ nii. Á nə fwa nətɔ, á nə swə á wà yoo swìn ba con, á bana tə duən, nə wà ba

waa ken Zwezi nə, ba wá twá ku nə, ba sèe wá. ² Ba wá na də, á yí là tə, á bɪcanɪ nə yí nəpwənə á tɔtɔnɛɛ mama wa, á ga jə zìlɛ də. Ku mù nə pɪn, ba wá sèe Zwezi. ³ Kana vwe ba yun, sə tə ya zəni. Ba kəni síán zanan ba bɪan nə, yá ba ga zwɪ ganzəŋə. Yá á mù, á dənà ká pa tə wiən təntə, ba nə na yíá wa, ya á bwanja wiən. ⁴ Ku tə nə mɛ, á yana là tə, á nə jə bɪcabwanɔ, á ga yí sənɔwɛn. Ku nətɔ dən wá bɪrɪ də, á bwanja tə yí ku wulə á waa con. Ku mù bwanja təntə yiri ba zwèe. Yá ku bwanja təntə ga jə funə zənzən, Yɪ yáá con. ⁵ Mə fuən kana tə, ba nə yí Yɪ cɪcɪ nə tɪ, ba nə jə yala Yɪ con, bwanja yá yí nətɔ. Yá ba ga sèe ba bana nii. ⁶ Mə nətɔ nə *Abərahame kan Sara yá yɪn. U yá sèe ɔ barɪ nii, ɔ ga boŋə wá ɔ <yuu tíú>. Á də jigə ndə Sara, də á nə fwa zəni ndə ɔ nə, á ga wà sèe, á pa fən yiri mama zɔ aba.

⁷ Síún nə, á də kanbana-ba, á liù mama mɛ, sə ɔ ja ɔ kan zəni. Á mɛ, sə á lwarɪ də, kana tə bwànà, ba doni aba. Yɪ pɪn mu tə, ku nə ba zwèe ɔ con, á mù də ba mù mɛ nə. Ku twá də ɔ pubwanɔ tə. Ku mù nə pɪn, á dən zìlɛ ba ku nətɔ tə yɪrɪ. Á nə fwa nətɔ, won wàrɪ á yɪjɔnɪ yáá nə ku cì, sə Yɪ ba le.

Ka fwa zəni yoo

(Romə tìán 12.14-21; Matìə 10.24-31; 1 Piyerə 2.12, 19-20)

⁸ Sə à ma gúrí, à swìn yìèn tə tə á con: Á pɪan, á mama ja pubɔŋa nədɔ. Á pɪan, á yojanɔ ya nədɔ. Á swéné á duən *Kərisə là tə. Á dərə

duen yinogə. Á muŋə á tiàn duen yáá con. ⁹ Liù nə fwa aba lwanı, á dànà ká fwa ku tíú lwanı, á ma ŋwín. Liù nə twın aba, á dànà ká twın ku tíú, á ma ŋwín. Yá á dàń me, sə á lòrì Yuı, sə ɔ fwa zəni ku tíú yuu wa. Yuı kúrí aba, sə á na zəni tə, ɔ nə wá fwa á yıra. ¹⁰ Ku púpúní Yuı sagı tə wa, ku wó:

«Liù nə pià, sə ɔ ya lɔɔ wa zəni də pupwən, ku tíú dàn ká swın səkəkwinan ɔ nii wa. Ʋ me, sə ɔ cì ɔ tiàn nə, ɔ dàn ká kɔna kunkun də. ¹¹ Ku tíú me, sə ɔ li ɔ tiàn yoo tə wa, ku nə lwara. Ʋ dàń me, sə ɔ fwa ku tə nə zien, ɔ ga pià bıcan sié də ɔ yaŋwıa mama. ¹² *Yuu-Tiu ywàŋá lià tə mama yuu, ba nə yı cígá tiàn. Máná tə, ba nə jònì wá, ɔ yáá cɔga ba yıjɔnı. Yá Yuu-Tiu dàń zıga lià tə nə, ba nə fwa ku tə nə lwara».

¹³ Wàà dàń nə wá fwa aba lwanı, də á nə ken á yawala mama lá, sə á fwa ku tə nə zien? ¹⁴ Yá á nə swə, á na càn cígá tə yırı, á me, sə á ya pupwən wa. Á dànà ká dəri ləzoni fən. Á dànà ká pa ku yoo yì aba. ¹⁵ Ku tə nə mɛe, á pıan dun Kərisə nə, á waa con. Ʋ mù nə ya á Yuu-Tiu. Á kənə á sírí máná mama, sə á wàní á le lià tə mama, ba nə bwe aba, á yala tə yuu wa, á nə jə də Zwezi-Kərisə. Á fwa ku yoo tə də bıcabwanı, sə á ja zilé zənzən. ¹⁶ Á pıan, á pubɔŋa ya pubɔnzəŋu. Ku nətı wá pa cavıra ja lià tə, ba nə swın ba zıga á nə, ba twın aba, á tɔtɔnɛ mama nə zien Zwezi-Kərisə cwəŋə tə wa yırı. ¹⁷ Á nə dí càn, á nə fwa zəni yırı, ku ga

yı Yu fıra, ku zıen ku doni, á nə dí càn, lwanı yırı, á nə fwa.

(1 Piyerə 2.21-24; Ebərə-ba 11.7; Romə tıan 6.3-4)

¹⁸ Cígá, Zwezi-Kərisə tətə tıga nə cuna tə yırı, naa nədu. U m̀ù liù tə, v nə yı cígá tíú, v tıga là tə yırı, ba nə tıŋa kunkun yìèn. U fwa ku tə, sə v ma van aba, v pa Yu nə. Ba li v mu luv wa, yá Yu-Sıŋu tə pın, v pıı v bwin v nan. ¹⁹ Yu-Sıŋu tə dãn pın, v va v swın Yu sugv tə là tə con, ba nə wulə tıga bwálı nə bãn diè wa. ²⁰ Ba m̀ù là təntə yı là tə, ba nə vıga, sə ba zilı Yu nii fuən fuən, máná tə wa, Yu nə fwa pınú də ba.

Mə ku máná tə wa, Nowe yà wulə v fwa níá yuu bori tə. Là wà dání yın, ba nə zva níá yuu bori təntə wa. Là nana cıci nə jon ba tıan níá tə, máná wa. ²¹ Ku yoo təntə nə yı, ba nə ləgə aba níá tə wa, ku twá də Yu yırı tə, nyınyıga. Ku m̀ù dãn nə jonə aba síún nə á cuna tə wa. Ku m̀ù níá swıv təntə, ba nə fwa aba, tà, sə ku sın á yıra durən. Ku níá swıv tə yı l̀òrì tə, á nə l̀òrì Yu con, sə v pa á pubıŋa ya pubınzəŋu. Ku níá swıv tə jonə aba á cuna wa. Ku nətv twá də Zwezi-Kərisə v nə pıı v bwin, v nan tıan wa. ²² Zwezi-Kərisə dıgà Yu sãn, v jèó Yu jızən* vãn nə. Yu dí yáá, v pa *malıke tə də wıən tə mama nə jə dıan, sèe Zwezi-Kərisə nii.

4

* 3:22 3.22 Ka jèń pıú jızən vãn nə yı dun bwálı.

*Á fwa kv tə, nə yɪ Yɪ fira
(Romə tián 6.6-13; Efezə tián 4.17-24)*

¹ Nə yə́ə́ də, *Kərisə dí càn v yira tə wa. Ku mù yiri, á də mə, sə á ya lià tə, á nə ken á sírí, sə á də dé càn, ndə v nə. Liù tə, v nə dí càn v yira tə wa nətu, ku tíú də v cuna pwèe duən nə. ² Ku tíú dān ya liù tə, v nə kúv ba ləzoni pùé yokukwɪnan fira nə twá. Yá dɪan tə, ku tíú mu nə ga, sə v fwa luv wa, v dān yɪ liù tə, v nə twá Yɪ fira nə. ³ Á dí yáá, á cùgù á máǵá ku nə dáá, á ma fwa yìèn tə, lià tə, ba nə yèrì Zwezi-Kərisə nə, fwa. Á dān yaga tə yìèn təntə. Dí yáá nə, á yà ba á tián janɪ yìèn tə wa. Á yà twá á pùé yokukwɪnan fira nə. Á yà nywìn swana á bubunɪ, də á dé wodirən zənzən, á ja lɛ, də á tɔŋa cavɪyɪən, tə nə lwara zənzən. Á yáá jèñ duən nə, á nywìn swana zənzən. Yá á dān bwi woŋwanan tə nə, ku ga yɪ yoo tə, Yɪ nə culi cígá cígá. ⁴ Síún nə, á kúv ba sèe á twá lià tə, ba nə yèrì Zwezi-Kərisə tə, á fwa ba yokukwɪnan tə, sə á pəni duən vɛɛ vɛɛ. Yá ku dān gwárí ba. Ku mù nə pɪn, ba dé tɪjaŋa á dèñ nə. ⁵ Ba wá tún ba níé Yɪ yáá con. U mù nə yɪ liù tə, v ken v sírí, sə v bùrì lià tə, ba wulə luv wa, də ba tə ba tɪga, bùrà. ⁶ Ku mù nə pɪn, ba dān swìn Yɪ sɔywanǵú tə, ba bɪrɪ tɪga tə nə, də ba tə wà tɪ, yà Yɪ nə swə v bùrì ba bùrà, ku tə yiri, ba nə fwa, máǵá tə wa, ba nə yɪn luv wa, ba dān wá bà ba ya mu wa də Yɪ.

*Á tɔŋa zəni də tarpɪvɪn, Yɪ nə pɪn aba
(Likə 21.34-36; Galasi tián 6.10; Romə tián*

12.5-11)

⁷ Luu wiæn tē mama mánǵá bwələ, sē tē zwèe. Ku me, sē á ya lià tē, á nē buŋa zēni, á ga yèó yoo dèh, sē á wàní á juŋ Yu zēni. ⁸ Sonu yáá pa, ba swèéé liù cōna kapupu. Ku mù yiri, yoo tē nē wulə tē mama yuu wa, ku mù nē yi, sē á sóni duēn, mánǵá mama. ⁹ Á jonə vərə tē, ba nē yi *Kərisə lià duēn, ba nē twi á con, á pa ba zuri á diè wa zēni. Á dānà ká fwa ku dē ŋuŋwian. ¹⁰ Á liù mama me, sē v ya liù tē, v nē ziga diàn, v ga ywàŋǵá Yu tarpɔn tē yuu zēni. U me, sē v ti tarpɔn yiri tē, Yu nē pin wá, v ma san lià duēn tē nē. ¹¹ Liù tē, v nē swìn Yu sɔgv tē, ku tíú me, sē v swìn ku tē, Yu nē ken v nii wa. Liù tē, v nē tuŋa, v pin v duēn nē, sē ku tíú tē tɔn dē diàn tē, Yu nē pin wá. Á fwa nətɔ, sē dun tē mama wàní tē twá Zwezi-Kərisə nē, tē ya Yu nyiæn. U mù Yu tē nē ti dun dē diàn mánǵá dē mánǵá, ku nē ba zwe. Amɔna!

Kərisə lià càn tē yoo

(*Matie 5.10-12; Tɔtɔnan 5.41; 14.22; 2 Tesalonikə tiàn 1.4-12*)

¹² À nubisoni-ba, á wulə càn wa, ndə ba ken aba mən wa. Á dānà ká pa ku di á yuu, ndə yoo tē nē, ku nē yi yovee. Mə ku wá twá nətɔ, ba ma lwarɔ dē, á ken á waa Zwezi-*Kərisə nē. ¹³ Ku tē nē me, á yana pupwən wa, á dē nē wulə á dé Zwezi-Kərisə càn tē yiri. Á nē dó tē càn təntə, mánǵá tē wa, v nē wá pií, v bà biri v tiàn v dun tē wa, ku wá pa á sú dē v pupwən tē.

14 Ba nə twın aba, á nə yı Zwezi-Kərisə karbıa tə yırı, á yana pupwən wa. Ku m̀ə yırı nə, Yı-
*Sıju tə, ku nə jə dun tə, wulə də aba. 15 Á liù
mama kə cıgá, v dən ká dé càn, v nə yı lagırv
yıri, nə à yəé, v nə yı ıwıàn yırı, nə à yəé, v nə
yı cırv yırı, nə à yəé, v nə kənə v nii, lià yıèn
wa yırı. 16 Yá v dən nə dí càn, v nə yı Kərisə liù
yıri, v dən ká pa ku cavıra ja wá. U me, sə v pa
dun Yı nə, v nə jə Kərisə yırı tə yırı.

17 Máná yı, Yı nə wá b̀rı lià b̀rı. U wá dí
yáá, v b̀rı v tətə lià tə b̀rı. Aa! Nə yı v lià,
yá v wá dé yáá v b̀rı nə tətə b̀rı. Ku dən wá
ya nətə, ku pa lià tə nə, ba nə vıga, sə ba zilı v
suywánı tə? 18 Ku púpúnı Yı sagı tə wa, ku wú:
«Də ku nə yı càn, ku pa liù tə nə yı cıgá tíú nə,
sə v nan Yı b̀rı tə jıın wa, ku dən wá ya nətə,
ku pa liù tə nə, v nə tun tutınkıkwınan Yı nə
ba pıà, də cına liù nə?» 19 Ku m̀ə tə yırı, lià tə,
ba nə dé càn Yı fıra tə yırı, sə ku tıán tə fwa
zəni wuu. Sə ba tı ba tıán mama ba kə Yı jıın
wa. U m̀ə Yı nə fwa ba, v ga yı p̀é nədı tíú.

5

Kərisə lià púlı yoo

*(Tıtınan 20.28; 1 Timote 3.1-7; Zwakə 4.6, 10;
1 Tesalonikə tıán 5.6-8; Efezə tıán 6.10-18)*

1 Sıún nə, à swın *Kərisə lià púlı yáá tıán tə
con, ba nə wulə á pwərə wa. À də tətə yı yáá tíú
don, ndə ba nə. À nı Zwezi-Kərisə, máná tə wa,
À də wá twá, à ya Zwezi-Kərisə dun tə wa, Yı
nə wá bıri. 2 Á ywáná Yı lià tə yuu, Yı nə pın

aba, sè á ywàñ ba yuu, ndə payıra nè ywàñá pee yuu nətʋ. Á dānà ká fwa kʋ ndə, kʋ yɪ ba kálí aba. Á ywàñá ba yuu də á waa mama, ndə Yɪ nè pìà, sè kʋ ya nətʋ. Á dānà ká fwa kʋ, ba nè wá ŋwín aba yɪrɪ. Á fwa kʋ də yanwɪa. ³ Á pɪan á ya là, ba duən tə nè twá á nè, ba lwarɪ nətʋ, ba nè mɛ, sè ba ya. Yɪ pɪn là tə, sè á ywàñ ba yuu. Á dānà ká dé diàn ba yuu wa. ⁴ Zwezi-Kərisə yɪ ndə payıra yuu tíú nè. Á nè fwa nətʋ, dɪn tə, ʋ nè wá bà, ʋ bɪrɪ ʋ tìàn, á wá na dun yupuu tə, kʋ zəni nè ba zwèe.

⁵ Á mù ləzwəndʋn-ba, á sàá yáá tìàn tə nii. Á mama muñə á tìàn duən yáá con. Kʋ púpúní Yɪ sagɪ tə wa, kʋ wú:

«Yɪ zɪga fwìə là nè, yá ʋ fwa pubwanʋ là tə yɪra, ba nè muñə ba tìàn».

⁶ Kʋ mù yɪrɪ nè, á muñə á tìàn ʋ yáá con, sè ʋ mù nè zìn aba yɪ nè, máñá tə wa, ʋ nè lɪ ʋ tún. Yɪ jə diàn tə mɛ yuu wa. ⁷ ʋ mù nè ywàñá á yuu nè. Á kənə yìèn tə mama, tə nè wɔwəlɪ aba, ʋ jɪn wa.

⁸ Á cɪa á tìàn nè, sè á ya là tə, á nè yèé yoo dèñ. Á dānà ká dʋèe. *Sɪtana yɪ á dʋɪʋ. ʋ yɪ ndə gəru nè, kʋ baa, kʋ kɪkarɪ, kʋ ga pìà liù, sè kʋ dé. ⁹ Á kənə á waa Zwezi nè wuuu, sè á zɪgɪ diàn, á ta Sɪtana. Á dān ga yèé də, là tə duən, tə ba nè yɪ á nubɪa Kərisə yɪrɪ, ba nè wulə lʋɔ bwálí mama, də na càn, ndə á də nè.

¹⁰ Yɪ dān nè fwa pubwanʋ á yɪra. ʋ twá də Zwezi-Kərisə, ʋ kúrɪ aba, sè á ya ʋ dun tə wa,

tə nə ba zwèe. Á wá dé càn mánjá mancun. Ku kwa nə, Yı tətə wá kwən aba v zıgı. U wá pa á zıgı dıàn á ma twá Zwezi-Kərisə nə, á ga wá dən á jıàn. Yá won kúbə ba wàní, ku pa á pıí á kə á kwa. ¹¹ U mù nə jə dıàn, mánjá də mánjá, ku nə ba zwe. Amına!

Sagı tə yígúré sòrán

(1 Tesalonikə tıán 5.23-28)

¹² Siləven yı nə nubiu *Kərisə yırı, v nə twá v nə də pùé nədv. Yá à dən twá v nə, à ma púpúnı sagıbiə ku tə á nə. À púpúnı á nə, sə à ma kwè aba, à ga bırı aba Yı pubwanv tə nə yı nətv, ku pa aba, cígá mama. Á dıga á tıàn á pa Yı pubwanv tətə nə. ¹³ Kərisə lıà púlı tə, ku nə wulə Babılənə nə tə, jònı aba. Ba yı lıà tə, Yı nə kúrí, ndə á də nə. À bıú Marəkə də jònı aba. ¹⁴ Á jònà duən də zılé zənzən də sonu, ndə Kərisə lıà nə mə, sə ba fwa nətv.

Yı wá pa bıcan sıé á mù lıà tə mama nə, á mù də Zwezi-Kərisə nə vwə duən nə.

Yu soywánó sagı
Nuni, Southern: Yu soywánó sagı New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 8 Feb 2022

d18530a7-7259-5f23-92b6-70e3abe5f3fa